



Michael Roth; Konrad Ammann; Anna Giacometti; Andres Türler ed Andrea Fasciatti fan impringias sül nouv cu-mainzaint da l'ouvra electrica da Löbbia.



La preschantaziun da la serrada d'urgenza da l'ouvra pro problems plü gronds d'eira bletscha ma fascinanta.

FOTOS M. FONTANA

Tramiss la prüma purziun forz'electrica da Löbbia a Turich

L'ouvra electrica da Löbbia es gnüda tutta in funcziun

DA MARTINA FONTANA / ANR

■ **In gövgia davomezdi es gnüda missa in funcziun la prüma turbina da l'ouvra electrica da Löbbia. Ils implants da far forz'electrica da la Val Bregaglia sun gnüts sanats dürant ils ultims trais ons per 65 milliuns francs.** La tensiun d'eira gronda cur cha la presidenta dal Comune di Bregaglia, *Anna Giacometti* e'l cusglier cumünal da Turich e schef da las Ouvras Electricas da Turich (EWZ) *Andres Türler*, han tut in funcziun la prüma turbina da l'ouv'r'electrica sanada da Löbbia. Davo ün cuort problem cul computer ha quai lura funcziunà: Il ventil a culla s'ha drivi, la turbina s'ha missa in funcziun e pac plü tard ha il generatur tramiss als da Turich la prüma purziun forz'electrica.

Id es ün dar e tour

«Il prüm sun gnüts in Bregaglia ils Ro-

mans, davo ils Spagnöls ed ils Frances e lura ils Züriegais», ha dit Anna Giacometti in riond in seis pled in occasiun da l'avertüra da l'ouvra electrica da Löbbia. Ch'in congual cun tuot tshels chi sajan rivats in Val Bregaglia hajan ils Züriegais però manà in val be avantags: «Els nun han be fabric'hà ouvras electricas e pisserà per plazzas da lavur, na, els han eir pisserà cha las chaschas cumünalas s'han remis-sas e s'han darcheu implidas», ha'la dit. Chi saja ün dar ed ün tour, ha intunà Andres Türler, «la EWZ ha investi ils 65 milliuns francs illa sanaziun da las ouvras bregagliottas, perquai cha quista val piserà per bundant 460 uras da gigawatt energia netta quai chi'd es ün tshinch-avel da l'energia chi vain dovrada l'on illa cità da Turich.»

Sanaziuns, ma ingün ingrondimaint

«Nus nu laschain ir in ruina noss indrizzs», ha declarà *Andreas Fasciatti*, il ma-

nader tecnic das las Ouvras electricas Bregaglia. Per far buna lavur e pudair lavurar in möd sgür ed efficiaint es l'ouvra a Löbbia perquai gnüda serrada per ot mais. In quel temp sun gnüts müdats ou-ra tuot ils transfuormatuors ed ils indrizzs da distribuziun (lingias da transport da la forz'electrica dad 110 000 sco eir da 220 000 volts). Id es gnüda fatta üna revisiun totala da la gallaria a pressiu chi consista per gronda part da büschens da fier. Quels as preschantaivan davo ils 50 ons chi d'eiran in funcziun be ruina. Quella es gnüda sgrattada davent ed ils büschens han survgni üna nouva protecziun cunter ruina. Ils indrizzs vegnan uossa masinats e controllats da computers e da tecnica digitala. Ils totalmaing 65 milliuns francs investiziuns sun gnüts fats plü o main be illa tecnica. Chi s'haja bainschi profità da l'occuriun e fat güsta eir tshertas renovaziuns vi da las turbinas. Ingrondi nun es l'indrizz però gnü.

